

**Pinerluttunut isumaginnittoqarfiup inissiisarfiini inissitat
taarsiissutissaminnut ilanngaaffigineqartarneranni suliat
suliarineqartarnerat pillugu nalunaarut
(ilanngaaffigineqartarnermik nalunaarut)**

Pinerluttulerineq pillugu inatsimmi § 230, imm. 2 aamma § 245, imm. 4, tak. inatsit nr. 306, 30. april 2008-meersoq, naapertorlugit makku aalajangersarneqarput:

§ 1. Inissitap pinerluttunut isumaginnittoqarfiup inissiisarfiianiitilluni taarsiissussatut pisussaanermik iliuuseqarluni pigisanik aseruinerani pinerluttulerineq pillugu inatsimmi § 230, imm. 1 malillugu sulisitaanermi aningaasarsiaminit taarsiissuteqarnissaanik pinerluttunut isumaginnittoqarfik aatsaat piumasqaateqarsinnaavoq taarsiissuteqarnissamik piumasqaat nalornissutigineqarpat.

§ 2. Pinerluttulerineq pillugu inatsimmi § 230 malillugu aalajangiinnginnermi pissutsit aalajangiinermut tunngavigineqartut pillugit paasissutissat naammaginatut pissarsiarineqaqqaassapput. Inissitap allanit ikiorneqarnissamut periarfissaq pillugu paasitinneqassaaq. Aammattaaq inissitap paasissutissat pigineqartut, tassunga ilanngullugit nalunaarutigineqartut killisiuinerillu pillugit paasitinneqassaaq oqaseqarnissaminullu periarfissinneqassalluni, taamaattorli tak. § 3.

Imm. 2. Killisiuisoqarpat killisiorneqartup nassuiaatimi imaqarniliornerata akuerinissaanut periarfissinneqassaaq killisiuinerlu pillugu imaqarniliami akuersisoqarnersoq allassimassalluni. Killisiuinerit inissiisarfimmi sulisunit marlunnit ingerlanneqassapput.

Imm. 3. Allakkiaq pissutsit issuarneqarnerannik, ilanngullugit nalunaarutigineqartut killisiuinerillu aalajangiinermut tunngavigineqartut pillugit allakkiortoqassaaq. Aammattaaq aalajangikkat tamatumunngalu tunngavilersuut allakkiami issuarneqassapput. Allakkiortoqassaaq pisunik issuaanertalimmik, tassunga ilanngullugu nalunaarutinik killisiuisoqarsimappallu killisiuinerit aalajangiinermut tunngavigineqarsinnaasut pillugit imaqartumik. Aammattaaq aalajangigaq tassungalu tunngavilersuut allakkiami issuaavigineqassapput. Tunngavilersuutip imarissavai inatsisitigut maleruaqqusanut aalajangiinermi tunngavigineqartunut innersuussut aammalu missingiinermi pingaarnertut mianerisassat sorliit aalajangiisuunersut, soorluttaaqq pissusiviit aalajangiinermut pingaarutilittut sunniutillit allassimassasut. Aammattaaq allakkiap imarissavai makku pillugit paasissutissat,

- 1) aalajangiineq tamatumunngalu tunngavilersuut illuatungerisamut qanga nalunaarutigineqarsimanersoq,
- 2) inatsisitigut maleruaqqusat sorliit naapertorlugit aalajangiisoqarsimaneramik inissitap ilisimatinneqartoq,
- 3) Inissiiffiup aalajangigaasa Pinerluttunut Isumaginnittoqarfiup pisortaanut naammagittaalliutigineqarnissaannut periarfissaq pillugu aammalu Pinerluttunut

Isumaginnittoqarfiup pisortaanut naammagittaalliuuteqarnissamut ulloq suna killissarititaanersaq pillugu inissitaq ilitserneqarsimasoq, tak. pinerluttulerineq pillugu inatsimmi § 245, imm. 1, aamma

- 4) arsaarinnissutit nalingat sapaatip akunnerani ataatsimi sulisitaanermi aningaasarsiat inissitamut tunniunneqartartut qaangerpagu allaffissornikkut aalajangiussap eqqartuussivimmi misilinneqartussat suliaassannortinneqarnissamut periarfissaq pillugu inissitaq ilisimatinneqarsimasoq, tak. pinerluttulerineq pillugu inatsimmi § 246, imm. 1, nr. 5.

Imm. 4. Eqqartuunneqartup qinnuteqarneratigut allakkiaq imm. 3-mi taaneqartoq tunniunneqassaaq, taamaattorli tak. § 3.

§ 3. Inissitap imaluunniit inuit allat pisortalluunniit soqutigisaannut, assersuutigalugu inissiiffiup isumannaatsuunissaa imaluunniit inunnik ataasiakkaanik illersuinissaq eqqarsaatigalugu inissitap imminut iluaqutissami isumaginissaanut allakkiamik atuisinnaanerminik soqutiginninnera aalajangiisuutinneqartussat isigineqarsinnaappat allagaatinik suliamut tunngasunik paasitinneqarsinnaatitaaneq pisortat ingerlatsineranni suliat suliarineqartarnerannut inatsit naapertorlugu killilerneqarsinnaavoq.

Imm. 2. Pisortat ingerlatsineranni suliat suliarineqartarnerannut inatsimmi maleruaqqusat malillugit illuatungerisaaq allagaatinik suliamut tunngasunik paasitinneqarsinnaatitaangippat inissitaq tusarniarneqassanngilaq.

§ 4. Taarsiissuteqarnissamik piomasaaqat nalornissutigineqanngippat, tak. § 1, taarsiissuteqarnissamik apeqquut eqqartuussivinnut suliaassannortinneqarsinnaavoq.

Imm. 2. Taarsiissuteqarnissamik apeqquutit eqqartuussivinnut suliaassannortinneqartut tamarmik inissiiffiup pigisanik aseruiiffiup inassuteqarnera malillugu Pinerluttunut Isumaginnittoqarfimmi pisortamit suliarineqassapput.

§ 5. Nalunaarut manna ulloq 1. januar 2010 atuutilerpoq.

Kalaallit Nunaanni Pinerluttunut Isumaginnittoqarfik , ulloq 7. december 2009

THOMAS NICOLAJSEN